



A lokisetse Morena Sechaba se phethehileng (Luka 1,17)

Tel: 28 350 466/ 62600983 (WhatsApp)

M5.00

MOELETSI OA BASOTHO

PARARE DOMINO PLEBEM PERFECTAM



Puisano khafetsa

3

Ba beha bana tlokotsing


8



BAM ENTLAFATSA

BOIKEMELO BA BASALI

www.moeletsioabasothis.co.ls



Re se re fumaneha ho marangrang

Email: newsroom@moeletsioabasothis.co.ls
Tel: +266 28350466/ Whats app: 62600983

MOELETSI

Lehlanya le'a bokaneloa

BAM e ntlafatsa

boikemelo ba basali

Nthabeleng Seitlheko

Baetapele ba basali ba tsoang mekheng e fapakaneng ea lipolotiki ba ipilelitse ho basali hore ba khaotse ho hulela ba bang morao, ho ba senyana mabitso le ho nyatsana,

tšehetsane. Ha re sa ema 'moho, ho ba bonolo hore ho etsoe liqeto tse re hatellang. Nako ea hore basali ba khutisoa kapa ba tšosoe e felile."Ho boletse Rantšo. O boetse a khothaletsa basali ho sebelisa palo e ntseng e eketseha ea boemeli ba bona paramenteng, ho tliša liphetoho tse tla sireletsa litokelo tsa basali le bana.

si oa Lipuisano Ntlong ea Bakhethoa, Tšepang Tšita Mosena, o hlalositse hore ho eketseha ha palo ea basali lipolotiking ho ka thusa ho susumetsa bacha, haholo banana hore ba be le sebete sa ho nka karolo litabeng tsa sechaba le tsa boetapele.

H'a bua ketsahalang eo Motsamaisi oa Lipuisano Ntlong ea Mahosana Mamonaheng Mokitimi, o itse basali ba lokela ho fuaa menyetla e mengata ea ho kenya letsoho lipolotiking,



empa ba sebelisane ho matlafatsa boetapele ba basali le ho phahamisa karolo ea bona liqetong tsa naha.

Molaetsa ona o hlahlile nakong ea ho thakhola ha leeto la "Bo-'me, bacha le bacha ba nang le bokooa tafoleng ea lipuisano", le hlophisitsoeng ke

Ka lehlakoreng la leng moetapele oa mokha oa Hope, 'Machabana Lemphane Letsie, o itse basali ba lokela ho sireletsana le ho phahamisa ba bang ho e-na le ho ba hulela fatše. "Ha re aheng basali ba khothatsanang, ba ratanang le ba tšehetsanang. Ha re

hobane ba na le karolo ea bohlokoa kholong ea moruo, pusong ea sechaba ka sechaba le ntšetsopeleng ea naha.

Leeto lena la BAM Group Foundation le ikemiselitse ho bona basali, bacha le bacha ba nang le bokooa ba fumana boikemelo bo feletseng litabeng tse ba amang, haholo-holo kahar'a sethala sa lipolotiki. Morero o moholo ke ho phahamisa boemeli ba basali le bacha ka Ntlong ea Bakhethoa hore bo fihle ho 60% likhetong tse tlang tse akaret-sang, e le karolo ea ho kete-ka lilemo tse 60 tsa boipuso ba Lesotho.

Morero ona o tla kenyeletsa mananeo a fapakaneng a reretsoeng ho matlafatsa bokhoni ba basali le bacha ho fihlela ka selemo sa 2027. O tšehelitsoe ke UN Women ka tšehetso ea European Union.



BAM Group Foundation ka la 23 Phupjane monongoha. Leeto lena le reretsoe ho matlafatsa kutloisiso ea basali le bacha ka litokelo le makhabane a bona, e le hore ba kenya letsoho ka botlalo ntlafatsong ea sechaba le ea naha.

Keketso Rantšo o itse o bile setho sa paramente ho tloha ka 2017, moo a 'nileng a loanela hore tsela ea basali lipolotiking e be e sireletsehileng, e lokohileng ebile e nang le seriti. O bontšitse hore e 'ngoe ea mathata a maholo a ntseng a sitisa tsoelo-pele ea basali ke ho hloka tšehetso har'a bona. "Basali re ntsere fokotsoa matla ke ho se



Mosotho oa masoetso o'a b'a opile khomo lenaka h'a re kopano ke matla, ho shoa ha noha ke ho tsamaea e le 'ngoe. Puisano ke ntho ea bohlokoa ebile e molemo. Ho thoe kopanela litaba u ruoe tsebo, inkele likeletso le teng u se tatele moro nama e-s'o butsoe.

Tona-Khoho ea Lesotho e tšoare ka thata ho bona hore litšebeliso li ea sechabeng. Taba ene ea ho tšoara boitekolo ba matona le bongoli ba makala, ruri e bohlokoa haholo. Ho lekola ka botebo boitlamo bo entsoeng ke bahlomphehi ha ba ne ba iketela ho khethoa ke sechaba.

Re rata mona moo a reng, puso ea sechaba ka sechaba e matla, e ka aha naha e atlehileng hafeela 'muso le sechaba ba buisana khafetsa, ba tšepana ba bile ba sebetsa 'moho ho etsa liqeto tse amang bophelo ba batho. A re ntšetsopele e ke ke ea qobelloa ho tsoa holimo, empa e tlameha ho etelloa pele ke sechaba ka bo sona.

Ho tlahela sechaba ka tšebetso eo 'muso o ntseng o e etsa ke taba e khothatsang, hore ho ke ho be le nako ea lipotso le likarabo mabapi le tšebeliso ea matlotlo a sechaba.

Seboka sena sa puisano le sechaba, ruri re bone e le taba e t'lo matlafatsa ponaletso, ho khothaletsa ho nka karolo ha sechaba, le ho tiisa moetlo oa hore baetapele ba ikarabelle ho batho bao ba ba sebeletsang. Ha litaba li ka tsamaea ka tsela eo, ruri sechaba se tla khotsofala haholo.

Re le Basotho re tlameha ho khutlela mekhoeng ea rona ea khale. Mehlang ea khale ho ne ho e-na le sebaka se bitsoang Thakaneng, ke moo bana ba bashanyana le banana ba neng ba rutoa ka lintho tse ngata tse ka ba amang kholong ea bona, le ho re ba se tšohle ha ba bona liphetoho 'meleng ea bona. Le ho se je lijo tse itseng, 'me ba sa botse lebaka empa bana ba morao, jooo, kea utloa kea tšaba!

Nakong ea pele ho ne ho se na lipeto tse na tse jeleng setsi kahar'a naha. Morao tjena batsoali ba lahlile boikarabello ba bona ba ho ruta kapa hona ho bua le bana ba bona ka bophelo bo botle le bohloeki linakong tsa bosali le boroetsana khoeli le khoeli. Ha se mohlolo ho ruta bana ba banana ka litaba tsa bocha le ho ilela khoeli e le hore a tsebe ho ithokomela.

Bashanyana le banna tlohellanang ho nka monyetla ho bohloeki ba banana le basali, ebang litšehetso tsa bona ka linako tsohle. Ha re qobeng se ka isang tšekefetsong ea banana le basali. Ho hobosa kapa hona ho tšeha banana ka linako tsa bona, e qetella e etsa hore ba be le tšabo ea ho ntšetsa lithuto tsa bona pele, etsoe ke tokelo e ngoana e mong le e mong ho kena sekolo.

Le hoja motho o ne o bona hore phetoho e t'lo ba kholo papaling ea bolo ea maotoo kahar'a naha lihlopheng tse kholo. Haholo ha re ile ra bona sehlopha sa Lijabatho se ikhapela Mohope oa Liki e Khoho ea Vodacom tlas'a bokoetlisi ba Monghali James Madidilane. E bile thabo ea khoho ho sehlopha le botsamaisi ka kakaretso, esita le batšehetsi.

Ao! Bana ba batho le hoja ba ne ba ikemiselitse ho ea itokisetsa Mohope oa CAF Championship. Ke moo thabo e ileng ea fetoha masoabi ha mokoetlisi a furalla sehlopha, le hoja joale bahlankana ba ne ba kopane ba utloisa morethetho oa hae. Ruri ke eane o entse khomo boela haeno o hlolele, o ile makholong a matala.

Basali, hoja la tlohela ho nyefolana kapa hona ho se tšehetsane. Nako e fihlile joale ea hore le eme ka maoto le itoanele hore le be teng hohle moo ho etsoang liqeto. Tlohelang ho chechela morao, tšoarang thipa ka bohlang joalokaha le tloahetse. Khaotsang ho fethetsana ka majoe, re lebetse hore palo ea lona e nyolohe ka Ntlong ea Bakhethoa ba sechaba, qetelong re ke re bona tona-khoho ea mosali. Tšoaranang ka matsoho e le hore moloko o tlang haholo oa bana ba banana o nke malebela ho lona. Khaotsang ho supana ka menoana.

MOLIMO A BOLOKE LESOTHO LE BASOTHO

Contacts: +266 28350 466

62600983 WhatsApp

Email: newsroom@moeletsiobasotho.co.ls

Sales and Marketing: (+266) 28 350 466/ 57396597 (WhatsApp)

MOELETSI oa BASOTHO
A LOKISETSE MORENA SECHABA SE PHETHEHLENG (LUKE 1:17)

EMAIL: editor@moeletsiobasotho.co.ls

sub-editor@moeletsiobasotho.co.ls

Mohale Lehlohonolo (Sub-editor)

(+266) 58 771 507 / 62 771 507

Journalists

Nthabeleng Seitlheko

Tšelisio Thakholi

Production Desk: 'Mateele Liqa

57 665 038/ 68 216 271

58 540 853/ 63 480 404

'Muso le sechaba ba buisane khafetsa-Tona-Khoho

Nthabeleng Seithleko

Tona-Khoho Nt-sokoane Samuel Matekane o re puso ea sechaba ka sechaba e matla, e ka aha naha e atlehileng feela haeba 'muso le sechaba ba buisana khafetsa, ba tšepana e bile ba sebetsa 'moho ho etsa liqeto tse amang bophelo ba batho. A re ntšetsopele e ke ke ea qobelloa ho tsoa holimo, empa e tlameha ho raloa le ho etelloa pele ke sechaba ka bo sona. Tsena o li buile Sebokeng sa Boetapele le Boikarabello se tšoaretsong Teyateyaneng ka la 21 Phupjane monongoaha,

O boletse hore puso ea sechaba ka sechaba ha e felle feela ka ho khetha baetapele nakong ea likhetho, empa e boetse e hloka hore baahi ba fuoe monyetla oa ho hlahisa maikutlo a bona, ho kenya letsoho liqetong tsa naha le ho botsa baetapele lipotso mabapi le tšebeliso ea matlotlo a sechaba.

"Ha ho na ntšetsopele ea 'nete ntle le ho kenya letsoho ha sechaba. Baahi ha



se baamoheli feela ba litšebeliso tsa 'muso, empa ke balekane ba ntšetsopele." Ho boletse Tona-Khoho.

O itse Seboka sa Puisano ea Sechaba le Boikarabello se reretsoe ho matlafatsa ponaletso, ho khothaletsa ho nka karolo ha sechaba litabeng tsa puso, le ho tiisa moetlo oa hore baetapele ba ikarabelle ho batho bao ba ba sebeletsang.

Tona-Khoho o hatelletse

hore boikarabello ke motheo oa puso e ntle. O re ha mekhatlo ea sechaba le baetapele ba ikarabella mesebetsing ea bona, ho ba bonolo ho loantša bobolu, tšebeliso e mpe ea lichelete tsa sechaba le ho matlafatsa tšepo ea sechaba pusong.

O boetse a re boikarabello ha bo ame lekala la phethahatso feela, empa bo ama mekhatlo eohle ea sechaba

le batho bohle ba filoeng boikarabello ba ho sebeletsa sechaba.

"Kaofela re bolokiloe ke tšepo ea sechaba. Matlotlo ao re a sebelisang a tsoa lekhethong la sechaba, ka hona re tlameha ho ikarabella ho batho ka tšebeliso ea ona." A rialo.

O khothalelitse bankakarolo ho sebetsa 'moho ho aha Lesotho le atlehileng, le kenyeletsang bohle, le ikar-

abellang le le mamellang mathata a ka hlahang nakong e tlang.

Ka lehlakoreng le leng, Tona-Khoho ea Rwanda Justin Nsengiyumva o itse puso e ntle, boetapele bo nang le pono le boikarabello ke tsona metheo ea phetoho ea 'nete Afrika.

O hopotse hore kamor'a polao e sehloho ea Tutsi ka 1994, Rwanda e ile ea tobana le mathata a maholo, empa baetapele ba naha eo ba ile ba khetha ho aha bokamoso bo betere, ka ho beha baahi pele le ho matlafatsa mekhatlo ea puso.

O itse pono e hlakileng ea naha, boikarabello ba baetapele le ho kenya sechaba letsoho, li thusitse Rwanda ho fihlela tsoelo-pele e kholo lilemong tse mashome a seng makae tse fetileng.

Seboka sena se bokelletse baetapele ba tsoang makaleng a fapakaneng a 'muso, tšireletso, batsamaisi ba litereke le balekane ba ntšetsopele. Lipuisano li shebane le ho matlafatsa puso e ntle, puso ea sechaba ka sechaba, boikarabello le ho potlakisa phethahatso ea Moralo oa Ntlatfatsa ea Naha (NSDP).

Lesotho le tla tšoara seboka sa AAPAM

Nthabeleng Seithleko

Lekala la Litšebeliso tsa Sechaba le tšoare thupelo ea boitokisetso bakeng sa likomiti tse nyenyane tse ikarabellang ho hlophiseng kopano ea Lekhotla la Tsamaiso ea Sechaba le Bohlophisi (AAPAM), e tla tšoareloa Lesotho ho tloha ka la 8 ho isa la 10 Tšitoe 2026.

Motlatsi oa Mongoli e Mopho Monghali Ntsu Shale o re sepheo sa eona ke ho hlomella litho tsa likomiti ka litsebo le boiphihlelo, bo tla

li thusa ho phetha mesebetsi ea tsona ka katleho pele ho kopano ena ea maemo a tikoloho ea Afrika.

Shale o boletse hore Lesotho ke setho sa AAPAM, mokhatlo o thehiloeng ho matlafatsa tsamaiso ea litšebeliso tsa sechaba le ho ntlafatsa mebuso ea Afrika ho fana ka litšebeliso tse sebetsang hantle ho baahi.

O boetse a hlalosa hore leha Letsatsi la Lefatše la Litšebeliso tsa Sechaba le ketekoa ka la 23 Phupjane selemo le selemo, Lesotho lona le le keteka ka Pulungoana. O itse ke tlotla e kholo hore naha e tšoare kopano ena ka selemo seo

Lesotho le ketekang lilemo tse 60 tsa boipuso.

A totobatsa bohlokoa ba litšebeliso tsa sechaba tse nang le boleng. Shale o itse mosebetsi oa litšebeliso tsa sechaba o ipapisitse le ho sebeletsa sechaba ka bots'epehi, ka ponaletso le ka boikarabello. O re thupelo ena e fana ka monyetla oa hore likomiti li buisane ka botebo ka mesebetsi le boikarabello ba tsona e le ho netefatsa hore lithlophiso tsohle tsa kopano li phethoa ka katleho.

Kopano ea AAPAM e lebelletsoe ho kopanya litsebi tsa tsamaiso ea sechaba, baetsi ba maano le baetapele ba mebuso ba tsoang



linaheng tse fapaneng tsa

Afrika, ho tla tšohla mekhoa ea ho ntlafatsa puso e ntle, boikarabello, ponaletso

le phano ea litšebeliso tse sebetsang hantle molimong oa ntšetsopele ea tikoloho ea Afrika.

Ho tšoaroa ha kopano ena Lesotho ho boetse ho fana ka monyetla oa hore naha e bontše matla a eona a ho amohela likopano tsa machaba le ho matlafatsa likamano le linaha tse ling tsa Afrika lefapheng la tsamaiso le puso.



The Office of **TJ General Dealer (Pty)Ltd** Reg.Number 56709 writes to inform shareholders and the public at large of its decision to move its registered addresses with effect from the **16th June 2026**.
Old address Caldron road P.O. Box 223 Butha-Buthe 400 Lesotho
New address Sir Seretse Khama Road Ha 'Mathata P.O. Box 567 Maputsoe 350

MOELETSI O TŠEHETSA BACHA

Tšeliso Thakholi

Ho ba le boitšepo ke ntho ea bohlokoa haholo ho mocha h'a qala a kena khoebong kaha ha motho a itšepa, ho bobebe haholo hore a ka itlhalisetsa mesebetsi e mengata e fapakaneng ea boipheliso ka nako e le 'ngoe, e le hore e tle e tsebe ho tsoela eena le bacha ba bang molemo. Ka mehla boitšepo ba mocha bo hola le ho matlafala h'a etsa lintho tseo a li ratang kapa tse bileng li monatefelang haholo.

Lepolesa Kolisang ke sehoai sa Ha Makopela haufi le Sekolo sa Mathomo sa Bochabela, seterekeng sa Mafeteng. O boetse o na le likhoebo tse fapakaneng ho tloha a ntse a hola. Ke e mong oa bacha bao esaleng ba ipabola haholo litabeng tsa khoebo. Ke sehoai sa temo ea meroho, lierekisi, o bile o ruile likhoho tsa nama. Litaba tsena kaofela li atlehile ka lebaka la hobane a e-na lerato, boitšepo le hoba sebete hore a ka itlhalisetsa likhoebo. O re phetela ka tsa tšebetso ena ea hae e ntle.

SEHOAI

Ho ba sehoai ha se polete e khoathoang ka lehlaka! Ka mantsoe a mang ho qala khoebo ea temo le leruo la likhoho, ha se mosebetsi o bonolo ho hang. Bobeli li batla hore motho a kene ho tsona ka mahlale a fapakaneng, a kang a tsebo ea poloko ea libuka tsa khoebo le hoba le tsebo e phetha-

hetseng ka litaba tsa temo, ka ho tsamaea lithupelo tsa mekhahlelo e fapakaneng.

QALEHO

Ke qalile khoebo ea likhoho ka 2018, ha ena ea temo ke sa le mocha haholo ho eona, kaha ke e qalile ka 2024. Ke hlahisa nama e ntle ea kho-ho ka mefuta e fapakaneng. E kaba moreki o e batla e hlabilo e bile e phuthetsoe hantle ka makhethe, kapa o e batla e ntse e phela ho ea itlhabela eona re ea mo thusa ka lipelo tsohle tsa rona tse mofuthu. Ke hlahisa meroho ka mefuta, empa haholo-holo oa 'cabbage' le erekisi ea lehoetla e monate bona boo hlolang!

TŠUSUMETSO

Ka thoko le hore ke ne ke se ke ntse ke e-na le lera-to la khoebo, tšusumetso e kholo e ileng ea etsa hore ke qale likhoebo tsena, ke ho re ke qobe ho hiroa le ho loantša tlhokahalo ea mosebetsi e aparetseng bacha matsatsing a morao tjena. Ke ne ke boetse ke batla ho itlhalisetsa mesebetsi e le ho loantša tšotleho le ho iketsetsa lintho ke sa hloke ho kopa chelete ho batsoali nako eohle. Joalokaha ke se ke e-na le lelapa ke atleha ho etsa tse ling tsa lithoko tsa lelapa, che le haese kaofela.

LIKATLEHO LE LIQHOLOTSO

Ka mosebetsi ona oo ke nt-seng ke o etsa, ke atlehile hoba le 'Shade net' le 'trays' tse hlahisang sethopo. Likhoebo tsena tsa ka li boetse tsa nthusa ho ba le linku tse ntlafalitsong tsa boea.

Haufinyane haholo ke tla be ke le e mong oa barui ba baholo ba linku tsa tlhahiso ea boea. Haele liqholotso tsona kannete ha ho moo li leng sieo, ho ba ke karolo ea bophelo ba rona ba letsatsi ka leng. Tabeng ea likhoho ke bareki ba tlabeng ba batlile likhoho tse ngata, e re ha ke qeta ho li kenya ebe ba se ba reka palo e fokolang haholo papisong le eo ba neng ba e batlile.

Ke tla be ke ba kolotiselitse ebe joale ha ba lokela ho lefa e ba bothata ba kob'a khomo, 'me sena se ama khoebo ea ka haholo. Haele ka mona ka temong teng,

hoebo tsena ke lintho tseo ke li ratang ka pelo eohle ea ka, ha ke batle ho arohana le tsona ho hang.

'MARAKA

Tabeng ea 'maraka ha ke e-s'o fumane motho kapa mabankete a reng ke hlahise khofo ba tla tla ba e nka ka bongata. Ke ntse ke e rekisa e le khofo e le joalo ke e rekisetsa batho ba motse. Empa morero o moholo oa ka ke ho bona ke rekisetsa bahoebi le mabenkele a maholo ha khoebo e ntse e hola. Ke tsamaea ka linkho tsa ka tse tletseng nama e monate ea khofo, ke kena

letho, kapa ba e-na le chelete eo e leng eona ea ho qetela. E le ho tlosa letsoalo lena ke khothaletsa hore ba fumantšoe lithupelo ka seo ba batlang ho se etsa, e le ho matlafatsa litsebo tsa bona.

Ebe ha ba se ba hlahelletsoe ka malebela, ba fumane bafani ba ka tsebang ho ba tšehetsa ka lithuso hore ba tsebe ho iqalla likhoebo ka litsebo tse chorileng. Leha ho le joalo, ke ba kopa ho felisa letsoalo le ho ba le boitšepo, hore ka litalenta tseo ba nang le tsona, ba ka tseba ho itlhalisetsa mesebetsi ba se lebelletse ho hiroa,



qholotso e kholo ke maemo a teng a leholimo hajoale, empa ke ntse ke leka, kaha ke fuoe malebela litabeng tsa mofuta o joalo, etsoe lik-

ntlo le ntlo ho e rekisa.

KELETSO

Ke ithutile hore hangata bacha bana le letsoalo la ho iqalla likhoebo ba sena

kaha mesebetsi e qephile kahare le kantle ho naha. Ka hona ke ba khothaletsa ho iqalla ea bona metseng ea habo bona.



“Ba nka monyetla ka bohloki ba basali le banana”

Nthabeleng Seithleko

Lekala la Tekano, Bacha le Ntšetsopele ea Sechaba ka tšebeliso no le Letlole la Machaba a Kopaneng (UNFPA) le phatlalalitse ka molao morero oa bophelo bo botle le bohloeki ba basali le banana linakong tsa bona tsa bosali le boroetsana khoeli le khoeli, tšebeliso e bileng Ha-Ralintši seterekeng sa Mafeteng, ka la 19 Phupjane monongoaha.

Molaetsa oa morero o re “Batsoali le bahlokomeli ba buoe le barali ba bona ka lipheto ho tsa bocha ba sa le malapeng, hobane ho thibela bofuma ba linako tsa khoeli ho qala teng.”

H’a bula mokete ona ka molao, Motlati oa Tona-Khohlo Justice Nthomeng Majara, o khothalelitse batsoali le bahlokomeli hore ba buisane ka bolokolohi le bana ba bona ka litaba tsa bocha le ho ilela khoeli.

O boletse hore banana ba bangata b’a tšoha kapa ba ferekana ha ba qala ho ilela khoeli hobane ba sa ka ba fuoa leseli esale pele. A bolela hore ho ilela khoeli ke karolo ea tlhaho ea khohlo e phethahetseng hantle, ha se taba e lokelang ho hlabisa motho lihlong. A boela a ipiletsa ho banna le bashanyana hore e be balekane ba tšehetsang banana le basali ba banyenyane e seng ho nka monyetla ka boemo ba bona.

Letona la Tekano, Bacha le Ntšetsopele ea Sechaba, Mohlomphehi Pitso Lesaoana, o bontšitse hore ke 10% ea banana ba lulang mahaeng ba kopanang le mathata a maholo a ho laola bophelo ba bona nakong ea ho ilela khoeli ka lebaka la maemo a thata a bophelo, ha 7% ea banana ba litoropong le bona ba ntse ba thatafalloa ke ho fumana lisebelisoa tsa bohlokoa tsa bohloeki.

Motsamaisi oa Lefapha la Tekano, 'Mapuleng Secheche, o boletse hore ho ruta bo-ntate le bana ba



bashanyana ka lipheto ho tsa bocha ho thusa ho theha tikoloho eo banana ba

elo ba thobalano le tlhaho Mafeteng, o hlalositse hore ho hloleha ho laola

sa 2025/2026, banana ba bane ba ka tlaase ho lilemo tse 15 ba ile ba ima, ha



sireletlitsoeng le ho hlonepeha ha eona.

O re maikemisetso a morero ona ke hore hobe le lipuisano ka ho ilela khoeli le bohloeki, e le hore

bohloeki nakong ea ho ilela khoeli ho ka baka mathata a bophelo bo botle, le ho fokotsa boitšepo ba banana. O boletse hore

banana ba haelloang ke

banana ba 83 ba ile ba ba le masea a lahlehetsoeng ke bophelo pele a hlaha.

O ile a hopotsa sechaba hore ho qala ho ilela khoeli ha ho bolele hore



e be ntho e tloaelehileng malapeng le likolong. O boletse hore ke lilemo tse ngata ho khutsitse le hoba le maikutlo a fosahetseng mabapi le ho ilela khoeli, 'me tsena li entse hore banana ba bangata ba fose sekolo le ho tobana le liqholotso tse fapakaneng.

Mooki Challa ea ikarabellang litabeng tsa boph-

tataiso le tšehetso ba kotsing e khohlo ea tlhekefetso ea thobalano, bokhachane lilemong tsa bongoana, ho ntša limpa ka mekhoha e sa sireletsehang le tšoaetso ea HIV.

O boetse a re Mafeteng ho na le bacha ba ka bang 1,328 ba ntseng ba fumana kalafo ea 'li-antiretroviral' (ART). Nakong ea selemo

ngoanana o se a loketse ho etsa thobalano, empa a khothaletsa bacha ho sebelisa litšebeliso tsa maemo a bophelo ba bacha tse fumanehang Litsing tsa Bophelo.

Moemeli oa Lefapha la Tšireletso ea Bana la Sepolesa sa Lesotho (CGPU), 'Mamosa Maile, o boletse hore sepolesa se ntse se

tsoela pele ho sebetsa le sechaba ho felisa sekho-bo se amanang le ho ilela khoeli. A hlalisa lipalo-palo tse bontšang hore ka 2025 ho ile ha tlahoia linyeoe tse 29 tsa tlhekefetso ea bana ba banana ba lilemo li 2 ho isa ho 14 le linyeoe tse 44 tsa basali ba lilemo li 15 ho isa ho 35. Ka 2026, ho se ho tlahiloe linyeoe tse peli tsa bana ba lilemo li 2 ho isa ho 14 le tse 26 tsa basali ba lilemo li 15 ho isa ho 35.

Letona la Lichelete le Moralo oa Ntšetsopele, Dr. Retšelisitsoe Matlanyane, o bontšitse hore banana ba bangata ba ntse ba sa kene sekolo hantle hobane ba sitoa ho reka mesangona ea bohloeki. O re ha ho ngoanana ea lokelang ho amouoa tokelo ea hae ea thuto ka lebaka la ho haella ha lisebelisoa tsa bohloeki.

H’a fana ka nalane ea morero, Moemeli oa UNFPA Lesotho, John Kennedy Mosoti o hlalositse hore morero ona o qalile Mokhotlong oa tsoela pele Maseru, 'me joale o phethela mokhahlelo oa ho qetela Mafeteng. O boletse hore ho ilela khoeli ke pontšo ea bophelo, ka hoo ha hoa lokela ho amahangoa le lihlong kapa sekho-bo. A re khaello ea tšehetso e ka qobella banana ho itšetleha ka batho ba ba fang chelete kapa limpho e le hore ba atlehe ho fihlela litlhoko tsa bona.

H’a koala ketsahalo ena ka molaetsa oa tšepo, Kamohelo Mosola oa Sekolo sa Mathomo sa Tšekelo o boletse hore sekolo sa hae se se se qalile ho theha tikoloho e sireletsehileng le e tšehetsang banana nakong ea ho ilela khoeli. O re sekolo se khethile mosuo ea ikarabellang litabeng tsena, sa theha sebaka se khethelileng matloaneng a banana, hape sa kenya thuto ea bophelo bo botle ba linako tsa khoeli lena-neong la thuto.

Kamohelo o re morero ona o fana ka tšepo ea hore banana ba bangata ba tla atleha ho tsoela pele ka thuto ea bona ka boitšepo, seriti le tšehetso eo ba e hlokang hore ba atlehe.

Bana ba nang le bokooa ba na le litokelo

Nthabeleng Seithleko

Mokhatlo oa Basotho ba nang le Boloka ba pono (LNLVIP) o hlalitse liqholotso ka tlolo ea litokelo tsa bana ba nang le bokooa ba pono, ha naha e le ketekelong ea Letsatsi la Ngoana oa Afrika. Tsena li hlalelletse puisanong le Mookameli oa Mokhatlo, Keletso Mangope, ka la 21 Phupjane monongoaha.

O re ho ntse ho e-na le batsoali le bahlokomeli ba patang bana ba sa boneng malapeng, e leng se ba amohang monyetla oa ho fumana litšebeliso tsa bohlokoa tse kang thuto le tlhokomelo ea bophelo bo botle.

O tiisitse hore bana ba nang le bokooa ba pono ba lokela ho kenyeletsoa ka botlalo mesebetsing ea sechaba le litšebeliso tsohle tsa sechaba, hobane ba na le bokhoni bo tsoanang le ba bana ba bang, ebile ke baetapele ba kamoso.

Mangope o boetse a hoptsa sechaba hore Lesotho le na le likolo tse amo-

helang bana ba mofuta ona ho tloha maamong a tsa mathomo ho ea ho tse phahameng, e le ho netefatsa hore ba fumana tokelo ea bona ea thuto ntle le litšitiso.

Ka lehlakoreng le leng, Lekala la Tekano, Bacha le Ntšetsopele ea Sechaba le tla tsoara mokete oa Letsatsi la Ngoana oa Afrika Nyakosoba, Maseru. Sehlooho sa selemo sena ke: "Ho netefatsa ntšetsopele e akaretsang ea metsi a hloekileng, bohloeki le litšebeliso tsa bohloeki bakeng sa bana bohle Afrika."

Letsatsi la Ngoana oa Afrika le ketekoa selemo le selemo ka la 16 Phupjane ho hopola sebete sa bana ba ileng ba ema ba loanela litokelo tsa bona Afrika. Letsatsi lena le boetse le sebelisetsoa ho phahamisa tlhokomeliso ka mathata a ntseng a tobana le bana le ho khothaletsa mebuso, mekhatlo le sechaba ho nka mehato e sireletsang le ho ntlafatsa boiketlo ba bana.

Mokete ona o boetse o fana ka monyetla oa hore mebuso e hlahlobe maano, mananeo le merero e retsoeng ho sireletsa le ho phahamisa litokelo tsa bana tikolohong ea Afrika.

Basotho ba khothaletsoa ho boloka bohloeki



Nthabeleng Seithleko

Letšolo la bohloeki le etelletsoeng pele ke mokhatlo oa Clean Lesotho Initiatives le atlehile ho tsofola sebaka se neng se se tletse mofoka le litšila Maseru, e le karolo ea boitekoko ba ho ntlafatsa tikoloho le ho khutlisetsa sebaka seo tšebelisoeng ea sechaba. Mothehi oa mokhatlo ona, Katleho 'Muso o buile tsena ka la 21 Phupjane monongoaha.

O re ba ile ba khetha sebaka seo ka lebaka la boemo bo neng bo se bo mpefetse, hammoho le hore se bonoa habonolo ke baahi le baeti ba fetang sebakeng seo. O re sebaka seo se ne se se lahlehetsoe ke seriti ka lebaka la mofoka o neng o se o se apanetse le litšila tse neng li qhalakane hohle. A re batho ba bang ba ne ba boetse ba sebelisa sebaka seo ka tsela e neng

e eketsa tšilafalo le ho senya chebahalo ea sona.

'Muso o hlalositse hore mosebetsi ona ke karolo ea merero e meholo ea mokhatlo ea ho hloekisa libaka tse kotsing ea tšilafalo, le ho theha tikoloho e hloekileng le e sireletsehileng bakeng sa sechaba. O re mokhatlo o na le takatso ea ho fetola sebaka seo hore e be serapa sa boikhatollo se ka sebelisoang ke sechaba, leha lipuisano le Lekhotla la Toropo ea Motse Moholo Maseru (MCC) li ntse li tsoela pele.

O boetse a re 'muso o ntse o nka mehato e fapaneng ho khothaletsa bohloeki metseng le met-saneng, ho kenyeletsoa matšolo a tlhokomeliso ka taolo e nepahetseng ea litšila, ho hloekisa libaka tsa sechaba ka tšebeliso le makhotla a libaka, ho beha mabokose a litšila libakeng tse hlokaahalang, le ho tiisa melao e thibelang ho lahla litšila ka mokhoa o sa nepahalang.

Ho ea ka eena, bothata ba

ho lahloa ha litšila ka mokhoa o sa nepahalang bo ntse bo tsoela pele metseng e mengata, moo lipolasetiki, mabokose a lijo le mekotla ea lithole li atisang ho lahloa libakeng tse sa lokelang.

O boletse hore Clean Lesotho Initiatives e tšehetsa mesebetsi ea eona ka chelete e fumanoang khoebong ea mahe le litšebeliso tsa temo ea lirapa, kaha ha e fumane tšehetso ea lichelete ho tsoa mekhatlong efe kapa efe.

'Muso o boetse oa ananela karolo e bapaloang ke bo-ralitaba ho phahamisa tlhokomeliso ka bohlokoa ba bohloeki le tlhokomelo ea tikoloho, a re sena se khothaletsa sechaba ho nka boikarabello ba ho sireletsa libaka tseo se phelang ho tsona.

O ipilelitse ho sechaba ho lahla litšila ka nepo le ho nka karolo mesebetsing ea bohloeki. A re tikoloho e hloekileng e kenya letsoho bophelong bo botle, botle ba litoropo le ntšetsopele ea naha.



KHOELEHETSO HO BACHA

Re kopa bacha bohle ba khoebong, tse ntseng li thuthuha

e tse seng li iphumane ba bue le Moeletsi oa Basotho ho:

newsroom@moeletsiobasotho.co.ls

kapa nomorong ea WhatsApp ea +266 62600983 ho arolelana

e bacha ba bang ba nang le khahleho ea ho qala

khoebo, empa ba sa tsebe ba ka qala joang.

WIDE FORMAT PRINTING

We offer durable, affordable & quick turnaround wide format prints. We can provide multiple options for indoors and outdoor applications - as well as produce any size you can imagine

BANNERS

SIGNS

POSTERS

PRINTS

FOR YOUR FUTURE
WE CARE

Call or whats App: +266 28350815/
22350224/ 68078124 (Whats app)

Mazenod PRINTING WORKS (Pty) Ltd
Prepare good People for The Lord

Bokulo ba kelello ha se boloi



kang thuso litsing tsa bophelo bakeng sa tlhahlobo le

Nthabeleng Seithleko

Ho fapana le matsatsi a fetileng ao mafu a kelello a neng a amahanngoa le boloi, lithohako tsa malapa le meea e mebe, Naha ea Lesotho e kene ka botebo ho sebetsana le bophelo ba kelello. Tse-na li builoe ke Dr. Mosiuoa Makhata, 'mokeng o neng o hlophisitsoe ke Mokhatlo oa Makatolike oa Toka le Khotso ka la 24 Phupjane monongoaha.

Sena se etsahala nakong eo lipalo-palo li bontšang hore bonyane 20.8% ea baahi ba naha, kapa motho a le mong ho ba bahlano, ea phelang le mofuta o itseng oa bothata ba bophelo ba kelello. Leha ho le joalo, ho ntse ho e-na le lekhalo le leholo la kalafo, kaha batho ba ka bang 82% ba hlohang litšebeliso tsa bophelo ba kelello ha ba li fumane.

O itse sechaba se loke-la ho khaotsa ho sheba matšoafo feela empa se shebane le lisosa tsa mathata a kelello. A bontša hore bana ba bang ba hola maemong a thata a bofuma, tthekefetso le ho lahloa ke bo-ntat'a bona. Maemo ana a ka baka maqeba a tebileng a maikutlo a ka amang bophelo bohle ba motho. "Re lokela ho utloisisa hore bophelo ba kelello bo angoa ke maemo ao motho a hlalatseng le ho holela ho ona, litaba tsa bophelo, lefutso, maikutlo le bophelo ba semoea." Ho boletse Dr. Makhata.

Moarekabishopo oa Tikoloho e Kholo ea Maseru, Tlali Gerard Lerotholi OMI o itse likereke li na le karolo ea bohlokoa ho thusa batho ba nang le mathata a kelello, empa thapelo feela ha e'a lekana maemong a mang. O khothalelitse hore likereke li sebelisane le litsebi tsa bophelo ba kelello, ka ho fetisetsa batho ba hlo-

kalafo.

Ba bileng 'mokeng ona ba ile ba lumellana hore tharollo e kholo ke ho tisa litšebeliso tsa bophelo ba kelello haufi le sechaba. Hajoale, batho ba bangata metseng ba tsamaea sebaka se selelele ho ea batla thuso, ha ba bang ba sa fihle ho hang.

Ho atolosa litšebeliso tsa bophelo ba kelello litsing tsa bophelo tsa mantlha, ho koetlisa basebeletsi ba bophelo bo botle, ho ruta sechaba ka bophelo ba kelello le ho felisa sekhobo ke tse ling tsa mehato e ka

thusang ho pholosa bophelo.

Mokhatlo oa Lefatše oa Bophelo (WHO) o sa tsoa amohela mohato oa Lesotho oa ho matlafatsa Leano la Naha la Bophelo ba Kelello, le reretsoeng ho etsa hore litšebeliso li fumanehe habonolo, li kenyeletse bohle e bile li arabele litlhoko tsa sechaba. Mathata a kelello ha se boloi, ha se thohako ebile ha se bofokoli. Ke bothata ba bophelo bo botle bo hlohang kutloello-bohloko, tsebo le kalafo.

Molula-Setulo oa Balula-Litulo tsa Paramente,

Mokhothu Makhanyane, o hlokomelitsitse sechaba le baetapele ba naha hore boemo ba bophelo bo botle ba kelello Lesotho bo se bo fihlile maemong a tsoahanyetso, a hlohang mehato e potlakileng le boitlamo bo matla ba lipolotiki. O bontšitse hore melao e laolang bophelo bo botle ba kelello Lesotho e se e tsofetse e bile ha e sa khona ho sebetsana le mathata a kajeno. "Ha re sa ka ra nka bophelo bo botle ba kelello e le taba e nyane. Haeba re sa nke mehato kajeno, litšenyehelo tsa ho sebetsana le litlamora o tsa mathata ana li tla ba kholo haholo nakong e tlang." Ho boletse Makhanyane.

Motsamaisi oa Lefapha la Bophelo bo Botle ba Kelello oa nakoana, Dr. Thabo Mokhothu, o re khaello ea liitsi tse fanang ka litšebeliso tsa bophelo bo botle ba kelello e ntse e le tšitiso e kholo. O hlalositse hore Sepetlele sa Mohlomi se ntse se jere moroalo o mohlolo, kaha ke sona setsi se sehlo sa phetisetso ea bakuli ba kelello naheng.

Leha ho le joalo, o re 'muso o se o qalile boiteko ba ho isa litšebeliso tsena haufi le batho, ka ho li kopanya le litšebeliso tsa mantlha tsa bophelo bo botle litleliniking le lipetleleng tsa litereke. O boletse a re ho hloka hore basebetsi ba bophelo bo botle metseng ba koetlisoe ka ho khetheha litabeng tsa bophelo bo botle ba kelello, e le hore ba tsebe ho thusa batho pele mathata a mpefala.

Ka lehlakoreng le leng, Dr. Thobekile Tšita oa Sepetlele sa Mohlomi o bontšitse hore Lesotho le ntse le na le khaello e kholo ea lingaka le litsebi tse koetliselitsoeng bophelo bo botle ba kelello.

O boletse hore leano la naha la bophelo bo botle ba kelello le haufi le ho amoheloa ka molao, e leng mohato o ka thusang ho matlafatsa karabelo ea naha mathateng ana.

Dr. Tšita o boletse a hlalosa hore Lesotho ha le na lipalo-palo tse felletseng mabapi le palo ea batho ba phelang le mathata a kelello, e leng se etsang hore ho be thata ho rala litšebeliso le maano a ipapisitseng le bopaki.

Le hoja tsebo e ntse e eketseha, litsebi li re batho ba bangata ba ntse ba lumela hore mathata a kelello a bakoa ke boloi, lithohako kapa meea e mebe. Tumelelo ena e etsa hore batho ba bangata ba se ke ba batla thuso ea litsebi kapele.

Linaha li kalime ka boikarabelo

Tšelisio Thakholi

Moetapele oa mokha oa YES, Molefi Ntšonyane o re nako e fihlile ea hore Lesotho le linaha tse ling tsa Afrika li rarolla bothata bo ntseng bo hola ba likoloto, kaha moroalo ona o sitisa tsoelo-pele, moruo le bokamoso ba meloko e tlang.

Ntšonyane o buile sena ha a kenya letsoho letšolong la Tokoloho ho Mekoloto, ka la 24 Phupjane monongoaha. Kamor'a hore Mokhatlo oa AIDS Healthcare Foundation (AHF) ka tšebeliso le MISA Lesotho, o phatlalatsa ka molao letšolo la lefatše la Tokoloho ho Mekoloto ka la 19 Phupjane monongoaha. O re linaha tse ngata tsa Afrika li qeta karolo e kholo ea lichelete tsa tsona li lefa likoloto, ho e-na le ho tsetela litšebeliso tsa bohlokoa tse kang bophelo bo botle, thuto, temo, mesebetsi ea bacha le ntšetsopele ea sechaba.

O boletse hore ha naha e lula e alima chelete ntle le leano le hlakileng la kholo ea moruo, e qetella e lahlehela ke matla a ho iketsetsa liqeto. Ho ea ka eena, maemo ana a beha bokamoso ba naha kotsing hobane mehloli e lokelang ho thusa bana le bacha e qetella e sebelisetsoa ho lefa likoloto

O boletse a hlokomelisa hore haeba Lesotho le linaha tse ling tsa Afrika li sa nke mehato kajeno, bofuma bo tla eketseha, mesebetsi e tla fokotseha, 'me litšebeliso tsa sechaba li tla tsoela pele ho putlama. O re likoloto li lokela ho sebelisoa ho aha moruo o hlalatsang mesebetsi le lekhetso. H'a pheth-

ela o itse ntoa khahlanong le likoloto ha se taba ea lipolotiki feela, empa ke taba ea toka ea moruo le tšireletso ea bokamoso ba bana, bacha le meloko e tlang.

Letšolo lena le seng le qaliloe linaheng tse ka bang 50 lefatšeng ka bophara, le ikemiselitse ho phahamisa tlhokomeliso ka moroalo oa mekoloto linaheng tse ntseng li thuthuha, le ho buella maemo a matle le a toka a kalimo a sireletsang boiketlo le seriti sa baahi.

H'a bua nakong ea ket-sahalo ena, Mookameli oa AHF tikolohong, Dr. Patrick Kanyema o re mekoloto ke e 'ngoe e sitisang ntšetsopele e tsoarellang linaheng tse ngata tsa Afrika. "Ona ke moroalo o sitisang ntšetsopele hobane lichelete tse neng li lokela ho sebelisoa ho matlafatsa bophelo bo botle, thuto le makala a mang a bohlokoa li qetella li sebelisoa ho lefa mekoloto." Ho boletse Dr. Kanyema.

O ile a hlalosa hore leha ho alima chelete ho ka thusa ho ntšetsapele naha, mebuso e lokela ho netefatsa hore mekoloto e lula maemong a laolehang le hore chelete e alimiloeng e sebelisoa pepeneneng mol-emong oa baahi.

Dr. Kanyema o boletse a hlalositse matšoenyeho ka litefiso tse phahameng tsa phaello, tseo hangata linaha tsa Afrika li li lefang ha li alima, ha linaha tse tsoetseng pele tsona li fumana likalimo ka litšenyehelo tse tlase haholo. "Re hloka toka pakeng tsa ba alimang le ba alimoang." A rialo.

Ka lehlakoreng la leng Ofisiri ea Bobuelli le Papatso ea AHF, Sebatso Lentsoenyane, o ile a hlalosa bohlokoa ba hore sechaba se be le tsebo le kutloello-bohloko, tsebo le kalafo. "Letšolo lena la Tokoloho

ho Mekoloto le reretsoe ho matlafatsa sechaba le ho se beha leseling. Baahi ba lokela ho utloisisa melemo le likotsi tsa mekoloto e le hore ba khone ho beha baetapele boikarabellong mabapi le tšebeliso ea lichelete tse alimiloeng." Ho boletse Lentsoenyane. O ile a re liqeto tse amanang le mekoloto li ama likarolo tsohle tsa bophelo ba sechaba, ho kenyeletsa bophelo bo botle, poloheho ea lijo le ntšetsopele ea sechaba, ka hona ho hloka hore sechaba se nke karolo ka mafolo-folo litabeng tsena.

Lipuisano tse ileng tsa tšoaroa nakong ea ket-sahalo li ile tsa shebana haholo le kamano lipakeng tsa mekoloto le litšebeliso tsa bophelo bo botle. Libui li hlokometse hore haeba naha e sebelisa chelete e ngata haholo ho lefa mekoloto, e ka sitoa ho tsetela ka ho lekana lipetlele, meriana le litšebeliso tse ling tsa bohlokoa tsa sechaba.

Barupeluo ba boetse ba bontšitse hore leha boemo ba mekoloto Lesotho bo ntse bo laoleha hajoale, ho bohlokoa hore naha e tsoele pele ho ba hlokolosi e le hore mekoloto ea nakong e tlang e se ke ea sitisa kholo ea moruo le ntšetsopele ea sechaba. Letšolo lena le khothalletsa ho alima ka boikarabelo, taolo e pepeneneng ea lichelete tsa sechaba le liphetoho maemong a machaba tse tla fa linaha tse ntseng li thuthuha menyetla e betere le e nang le toka ea ho alima.

Ketsahalo ena e hlophisitsoe ke AHF le MISA Lesotho e le karolo ea letšolo la lefatše la bobuelli le ikemiselitsoeng ho khothalletsa toka ea moruo, le ho sireletsa matsete a etsoang makaleng a bophelo bo botle le litšebeliso tsa sechaba.

Ba beha bana tlokotsing

sion Lesotho, Monghali James Chifwelu Nkemba o itse leano lena le lecha la

Tšeliso Thakholi

Morena oa Se-hlooho oa Koeneng, Morena Lesaoana Peete o re ka lebaka la tla-la, tlhobolo le tlhokahalo ea mesebetsi, batsoali bana le tloaelo e sa nepahalang ea ho siea bana ba le bang ka malapeng, ho ea ba fatela metsuntsunyane libakeng tse hole haholo le malapa. O buile tsena moketeng oa ho khakola leano le lecha la tšebetso la World Vision o bileng Bela-Bela seterekeng sa Berea haufinyane.

O boletse hore ho ea ba tlela bana seo ba ka phelang ka sona ha se phoso, empa batsoali morao tje-na ba bonahala ba lahlile boikarabello ba bona ba ho hlokomela le ho holisa bana, ba ba siea khrehloa ka malapeng, e be ba sala ba ikhulisa le ho fetoha batsoali ba ntse ba le tlaase lilomong. "Na rea bona hore boikarabello ba rona boo re bo lahlileng ke bo boholo hakae? Na re hlokometse



hore re bo phetha hanyane ha ka kang?" Ho botsa Morena Peete.

A re le ha batsoali ba ntse ba leka ho batla mekhoea ea ho phelisa malapa, haba lokele ho siea bana ba le bang ka malapeng kaha e le boikarabello ba bona ho holisa bana, e seng bana ba ikhulise. A re taba ena ea ho siea bana ba le bang e behile bophelo ba bona tlokotsing e kholo, ka ho ba le litla-morao tse bosula tse kang; lipolao tse sehloho le tlikefetso ea bona ka me-

khoa e fapakaneng.

A etsa mohlala ka ngoana ea lilemo li 'ne oa hona motseng oa Kueneng, eo a itseng o na le matsatsi a mahlano a ntse a batloa ho sa tsejoe moo a teng, "empa tlaleho e re o ile a nonosoa limpompong ke motho oa monna, eo pelaelo e leng hore o nkiloe ke eena, 'me ha e-s'o fumanoe le kaje-no." A ipiletsa ho sechaba ho fana ka menyenyetsi e tlang ho lebisa hore beng ba liketso tsena tse soto ba fumanoe le ho behoa kapel'a

makhotla a molao.

A thetha puo ea hae ka ho thoholetsa World Vision ka ho ruta sechaba ka mekhoea ea ho iphelisa e kang ea ho itlhamisetsa lijo le ho etsa mesebetsi ea matsoho, e le ho loantšha tlhokahalo ea mesebetsi. A ipiletsa ho sechaba ho emisa ho ea Afrika Boroa ho ea batla mesebetsi, ba khutlele hae ho tla etsa mekhoea ea ho iphelisa le ho itlhamisetsa mesebetsi ba ntse ba hlokometse bana.

Mookameli oa World Vi-

tšebetso le bohlokoa haholo, kaha liphetoho tse teng, li tlii' o thusa ho arabela litlhoko tsa bophelo tse teng hajoale. A re le tli' o thusa ho nolofatsa bophelo nakong ena eo bo ntseng bo thatafala, ka lebaka la lintoa tsena tse ntseng li loana lefatšeng le ho thusa mae-mong a phetoho ea boemo ba leholimo. A re sepheo se sehlo sa World Vision ke ho sebetsa le bana, ho thusa ba tlokotsing ka ho tliša phetoho bophelong ba bona.

Sechaba se imona menoana

Nthabeleng Seitlheko

Lesotho le ntse le tobane le phephetso e kholo ea tlhokahalo ea mesebetsi ho bacha, morero oa ho tso-solosa tsela ea likilomithara tse 12 Tša-le-Moleka o fana ka tšepo e ncha ho malapa le sechaba ka kakaretso. Tsena li hlahelletse puisanong le baahi ba matse eo ka la 23 Phupjane monong-gaaha.

Lipalo-palo tsa morao-rao li bontšha hore ho hloka mesebetsi har'a bacha ke e 'ngoe ea mathata a maholo ka ho fetisisa Lesotho, moo bacha ba bangata ba qetang lilemo ba sa fumane menyetla ea mosebetsi kapa ea ho iketsetsa mesebetsi. Boemo bona bo eketsa bofuma, bo baka ho falla ha bacha metseng ea habo bona le ho fokotsa menyetla ea ntšetsopele ea moruo.

Leha ho le joalo, Lekhotla la Setereke sa Botha-Bothe se qalile morero oa

ho tso-solosa litsela tse hokahanyang metse e fetang leshome tlas'a Lekhotla la Puso ea Libaka la Tša-le-Moleka. Morero ona o tšehelitsoe ka chelete e ka bang M15Millione, 'me o lebelletsoe ho hlahisa mesebetsi e pakeng tsa batho ba 750 le 800, boholo ba bona e le bacha ba lulang metseng e tla una molemo morerong ona.

Mongoli oa Lekhotla la Setereke sa Botha-Bothe, Mathulise Mathulise, o re

morero ona ha o shebane feela le ho lokisa tsela, empa o boetse o reretsoe ho hlahisa menyetla ea mesebetsi le ho ntlafatsa bophelo ba batho ba lulang sebakeng seo. O boletse hore batho ba 30 ba se ba qalile ho sebetsa, ha mosebetsi o kenyetsetsa ho phatloha ha mafika, ho aha marokho le ho lokisa likarolo tse senyehileng tsa tsela.

Moahi oa Sekubu, 'Masentle Molapo, o re ho fihla ha mechini ea moseb-

etsi ke sesupo sa phetoho eo sechaba se neng se e emetse ka lilemo. O re tsela e ne e se e le kotsi haholo, haholo nakong ea lipula, moo lipalangoang li neng li sitoa ho sebetsa hantle. "Re thabile haholo hobane tsela ena e tla nolofatsa bophelo ba rona. Hape re thabela hore bana ba rona le bacha ba bangata ba tla fumana mesebetsi, ba khone ho hlokomela malapa a bona." Ho boletse Molapo.

Chebechana Molebee e le moqhobi oa kolo ea baeti, o re boemo ba tsela bo ne bo ama haholo litšebeliso tsa bophelo bo botle. O hlalositse hore hangata o ne a bitsetsoa ho isa bakuli lipetlele bosiu, empa mae-mo a tsela a ne a mo sitisa ho fihla ka nako. "Ka lina-ko tse ling bakuli ba ne ba lahlehela ke bophelo pele ba fihla sepetlele. Likoloi tsa rona le tsona li ne li senyeha khafetsa ka lebaka la tsela e mpe." A rialo.

Molula-Setulo oa Lekhotla la Puso ea Libaka la Tša-le-Moleka, Tihakanelo Mokete, o re bana ba bangata ba sekolo ba ne ba sitoa ho ea sekolong ha lipula li ne li tšoloha ka bongata, hobane marokho a ne a sa tšelehe habonolo. O re


hang ha morero o phethiloe, bana ba tla khona ho fihla likolong habonolo, bakuli ba fihle litsing tsa bophelo ka nako, 'me khoeb e tsa-mae hantle.

Molula-Setulo oa Lekhotla la Setereke Motlalepula Nkone, o re katleho ea morero ona e bontšha bohlokoa ba tšebeliso-no-mmoho lipakeng tsa lekhotla le sechaba ho rarolla mathata a amang batho letsatsi le letsatsi.

Le hoja morero ona o sa rarolle bothata bohle ba ho hloka mesebetsi Lesotho, o fana ka mohlala oa kamoo matsete mererong ea litsela le meaho a ka hlahisang mesebetsi, a matlafatsa moruo oa lehae le ho ntlafatsa litšebeliso tsa bohlokoa.

Bakeng sa bacha ba bangata ba Tša-le-Moleka, mechini e qalileng ho sebetsa haufi le Sekubu ha e bolele feela tsela e ncha e bolele monyetla oa mosebetsi, chelete ea ho tšehetsa malapa le tšepo ea bokamoso bo betere.

Morero ona o tla ama metse ea Sekubu, Matsatsaneng, Ha Selomo, Khilibithing, Mjanyela, Ha Sebophe, Ha Pokane, Likhahleng, Manamela, Qalo, Ha Malofo, Ha Makhoahla, Ha Mohlanka, Ha Lishobana le Maloseng.





TSA KEREKE

Babishopo sebokeng

Tšeliso Thakholi

Ba b i s h o p o ba Kereke e Katholike ba Burkina Faso-Niger(CEB-N) ba bile sebokeng sa bona sa selemo le selemo, Tikolohong ea Ouagadougou, naheng ea Burkina Faso, ka la 17 ho isa la 21 Phupjane monongoaha. 'Moko-taba e ne e le ho netefatsa boitlamo ba bona ba ho tliša khotso, ho matlafatsa matlo a lithapelo a bakriste le ho nchafatsa thuto ea 'nete ea Kereke e Katholike.

Sebokeng sena babishopo ba bontšitse har'a

lelapa le leholo la Morena Molimo tikolohong ea Afrika. Ba boetse ba ananela boitelo bo seng bo entsoe ke matlo a na litikolohong le liparishing. Ka hona ba kopa baprista, baitlami le bakriste ho tsoelapele ho tšepahalla mosebetsi oa bona ka ho matlafatsa matlafatsa matlo ao, e le tsela ea 'nete ea borapeli le borumuoa.

Babishopo ba thoholetsa mosebetsi o matla o ntseng o etsoa ke balumeli ba Burkina Faso le Niger oa ho ntlafatsa le ho holisa Kereke ea Morena Molimo e leetong lefatšeng lena. Ba khotsetsa bohle ba nang le litsebo tse fapakaneng ho

neng o kopanetsoe ke balumeli bohle ba Kereke lefatše ka bophara, ho kenyelelitse le Ntate ea Halalelang Mopapa Leo XIV. Lithapelo tse koalang seboka li ne li lumellana hantle le tsa Rabalumeli tsa ho rapella Naha ea Burkina Faso tse tliš'o tšoaroa ka la 29 Phupjane 2026. Ke hona 'misseng oo o moholo babishopo ba ileng ba boela ba rapella ka mokhoa o khethehileng Rabalumeli, barumuoa ba kereke ba Burkina Faso le Niger le litaba-tabelo tsohle tse ntle tsa batho bakeng sa ho tliša khotso, tšireletseho le tšepo.

-VATICAN News-



tse ling bohlokoa ba ho khotsetsa khotso le botsitso ho pharalla le Tikolohong ea Sahel e ntseng e hloka botsitso. Ba boetse ba ipha nako ea ho nka karolo moketeng o moholo oa phano ea likhau bakeng sa Litlholisano tsa Baqolotsi ba Litaba, kaha e le bona sebetsa sa bohlokoa se ka ba thusang ho khotsetsa moea oa lipuisano tsa khotso, ho phelisana 'moho le tšebeliso 'moho ea sechaba tharollong ea mathata a tobaneng le Sahel.

Babishopo ba ile ba tšohla bohlokoa ba ho matlafatsa matlo a lithapelo a bakriste, kaha sena ba se bona e le tšiea ea mantlha ea Kereke, e bile e le

fetisetsa nalane ea Evangeligeli ho moloko o ntseng o hola e le hore molaetsa oa Molimo o tle o phele le melokong e tlang.

Ba phethela seboka sena ka ho phatlalatsa mokete o moholo oa sehopotso sa Jubile ea lilemo tse 125 Kereke e Katholike e thehiloe o tlang ho tšoaroa selemong sena. Ba leboha 'muso oa Burkina Faso ka tšebetso e matla eo o ntseng o fana ka eona litsing tsa Kereke. Ba ipiletsa ho bohle ho tsoelapele ho kenya letsoho, molemong oa ho matlafatsa thuto ea Kereke e Katholike.

Seboka sena se ile sa koaloa ka Sehlabelo se Halalelang sa 'Missa o

Thapelo ea Khotso

Oho Molimo oa toka le khotso, re hlonolofatse rona baahi ba Lesotho, 'me u re thusa ho phela khotsong le leratong la hao.

"Morena, nketse mosebetsi oa khotso ea hao. Moo lehloeo le leng teng, ke jale lerato. Moo batho ba fosetsaneng, ke jale tšoarelo. Moo lipelaelo li leng teng, ke jale tumelo. Moo batho ba nyahameng pelo, ke jale tšepo. Moo lefifi le leng teng, ke tliše leseli, Moo masoabi a leng teng, ke jale thabo. Molimo oa ka, etsa hore Ke se ipatlele ho tšelisoa, ke mpe ke tšelise ba bang. Ke se ipatlele ho utloisisoa, ke mpe ke be ea utloisisang ba bang. Ke se ipatlele ho ratoa, e mpe e be 'na ea ratang ba bang, Hobane ke ka ho fana, re fumanang, ka ho tšoarela, re tšoareloang. Ka ho shoa, re tsoalloang bophelo bo sa feleng.

Amen."

2025-2026 SELEMO A

SONTAHA SA 13 HAR'A SELEMO




Likhosi 4:8-11.14-16

Pesalema 88

Ba-Roma 6:3-4.8-11

Matheus 10:37-42



Khothatso

Ea le amohelang o'a nkamohela

Kereke e re khotsetsa ho inahana holim'a tšoarelo ea rona ea ho amohela baeti. Kamohelo ea baeti ke ntho eo re e tsebang; ha re hloke ho e rutoa. Har'a makhabane a sechaba sa rona bo bong bo bohlo ke kamohelo ea baeti. Ha re e-s'o utloa hore moeti ea phirimetsoeng o ile a hloka moo a ka phomolang teng ha habo rona. Le teng ha re e-s'o utloa hore moeti o ile a robala le tšala kapa a hloka le tsona likobo.

Basotho ba chakelang linaha tse kang tsa Europo kapa tsa Amerika, ba re phetela kamoo linaheng tsena 'muso e le ona o hlokomelang likhutsana, ba holofetseng le maqheku. Rona re ka ithorisa ka hore re tseba ho hlokomela likhutsana, ba holofetseng le maqheku, 'me re ke ke re siela 'muso boikarabello bona bo re tlamang re le sechaba.

Re tšoaetse ho leboha Morena Molimo ea khabisiseng sechaba sa rona ka bokhabane bona ba kamohelo ea baeti. Empa leha ho le joalo, re lokela ho hlaloba le ho bona hore na re amohela baeti ka mokhoa o nepahetseng, ke hore ka moea oa sekriste, ka baka la lerato la Molimo. A re qaleng ka mohlala oa mosali oa Shuneme, eo re utloileng litaba tsa hae thutong ea pele, 'me kamorao re tla mamela thuto ea Jesu holim'a kamohelo ea baeti.

Buka ea bobeli ea Likhosi e re phetela tabanyana ena e etsahetseng mehlang ea moprofeta Elisha, morutuoa le mohlalami oa moprofeta Elisha, 'me ea neng a phele lilemo tse fetang makholo a robeli pele ho Kriste. E ne e le moprofeta e moholo, ea ileng a etsa mehlole e mengata bophelong ba hae ka matla a Molimo. Litaba tseo re li balileng kajeno li re bontša hore kamehla Molimo o putsa ba etsatsang metsoalle ea hae molemo.

Mosali oa Shuneme, eo re buang ka eona, e ne e le mosali oa morui. Seo a se etselitseng moprofeta Elisha se ne se sa fete matla a monna oa hae: o ile a mo ahela kamorenyana e nang le bethe, tafole, setulo le lebone, hore mohlala moprofeta a fapohelang motšeng a tle a phomole teng. Mosali enoa h'a ka ikhantša ka letho kapa a itima letho ho phetha morero oa hae, hobane e ne e le mosali oa morui 'me o n'a e-na le matla a ho etsa joalo. Empa seo a se entseng se a rorisaha, hobane ke ho thusa Elisha, o n'a sa thusa motho feela, o n'a thusa monna ea halalelang oa Molimo, 'me ka ho mo thusa joalo, o n'a rata ho thusa Molimo ka sebele lerato le ho 'montša lerato la hae. Ketso ea hae ea lerato e entse hore a fumanane mopotso o moholo, o tsoang ho Morena Molimo ka sebele. O n'a se na ngoana, empa a lakatsa ho ba le eena, feela a se na tšepo ea ho mo fumana. Morena Molimo a mo leboha ka ho mo sitsa ka ngoana oa moshanyana.

Ha re leboha mosali enoa oa Shuneme ka mohlala o motle oo a re fileng oona 'me re mo lebohele ka mopotso oo a o fumanang, joale re tšoaetse ho utloa seo Jesu ka sebele a re bolellang sona ka taba ena ea kamohelo ea baeti, Jesu o bua le bapostola ba hae, ke hore barumuoa ba hae, o ba tšepisa hore bohle ba tla ba amohela 'me ba ba thusa ka ntho efe kapa efe, esita le ka mohope oa metsi feela, ba ke ke ba tingoa mopotso ha ba etsa joalo ka hore ke barutuoa ba hae.

Re utloisise hore Morena Molimo ha a talime hakaalo ntho eo re fanang ka eona. Mosali oa Shuneme o n'a fane ka ntho hobane o n'a e-na le matla a ho etsa joalo, athe ea se nang letho o tla fana ka mohope oa metsi feela. Seo Molimo a se talimang ke morero oa motho ea fanang, mohopolo oa hae le moea oa a fanang ka oona.

Ketso ea lerato hore e be ke ketso ea lerato e lokeloang ke mopotso o tsoang ho Molimo, e ka khona e etsoe ka baka la Molimo. Ke seo re se bolellang ha re etsa thapelo ea Ketso ea Lerato ka tsatsi le leng le leng: "Oho Molimo oa ka, ke u rata ka pelo ea ka eohle, ho feta lintho tsohle, hobane u molemo ka ho fetisisa. Hape ke rata batho bohle, esita le lira tsa ka, joalokaha ke ithata, ka baka la hao." Mantsoe ana a qetello a reng: re rate batho 'me re ba thusa ka baka la Morena Molimo, ke 'ona a bohlokoa.

Re ka ipotsa joale holima mokhoa oo re amohelang baeti ka oona. Ke 'nete sechaba sa rona se tumme ka bokhabane bona 'me ka nepo se rorisoa ke batho ba linaha tse ling, ba re: "Basotho ke sechaba se tsebang ho amohela baeti." Ho joalo, empa re ka amohela baeti ka mekhoe e mengata, athe o mong feela o nepahetseng. Re ka ba amohela kahobane e le moello oa sechaba o re tlamang 'me re sitoa ho etsa ka mokhoa o mong. Re ka ba amohela ka ho ba thusa ka ntho tsohle tseo ba li hlokanang ka ho ea ka matla a rona, empa ka ho tsoafa. Re ka ba amohela hobane ke banna ba halalelang ba Molimo, kapa bana ba Molimo, kapa ba ratoang ke Molimo. Re ka ba amohela ka ho ba talima e le Kriste ka sebele, eo re lekanang ho mo thabisa le ho mo khahlisa ka matla 'ohle a rona. Mekhoa e 'meli ea qetello ke eona e bitsoang ketso ea lerato, ke hore ketso e etsoang ka baka la Morena Molimo. Ke eona e tla re fumantša mopotso o tsoang ho Morena Molimo.

Bahalaleli har'a Beke

- 29 Phupjane Peter
- 30 Phupjane Lucina
- 1 Phupu Veep
- 2 Phupu Aburom
- 3 Phupu Thomas
- 4 Phupu Ulric

Makoanyane XI e itokisetsa COSAFA

Tšeliso Thakholi

Makejakejane a Sehlopha sa Naha sa Makoanyane XI a tla emela le ho fofisa folakha ea Naha ea Lesotho litlholisanong tsa Mohope oa COSAFA tse tliil' o tšoarella Naheng ea Mozambique ka la 26 Loetse ho isa la 5 Mphalane monongoaha, se se se qalile boitokiso bo matla lebaleng la Bambatha Sports Arena, Maseru, tlas'a leihlo le nchocho la mokoetlisi Motolo Makepe ka ho fapana ha matsatsi. Sehlopha se tla ipabola lipapaling tse, se tla fetela ka kotloloho lipapaling tsa ho phunyeletsa tsa CAF U20 AFCON.

Balateli ba papali ea bolo ea maoto ba boletse hore sehlopha sa ba ka tlaase ho lilemo tse 20 ha se be laetsa, kaha se bonahala se kenyelelitse lihlopha tse ngata kahar'a naha. Ho feta mona ba bontšitse hore lethathamo leo le se hlole le fokotsoa, kaha e le la libapali tse matla haholo ho tsoa lihlopheng tsa

bona. Ke lekhetlo la boraro Makoanyane XI e kenela litlholisano tsa Lekhotla la Lipapali la Linaha tse Boroa ho Afrika(COSAFA), e ne e bapale hantle ka 2005 ha li ne li tšoaretsoe Naheng ea Benin, moo e neng e khutle ho seka-makhaolakhang a lipapali tse, nakong eo se neng se koetlisoa ke mofu Mochine Matete.

Sa boela sa sebetsa hantle ka 2011 lipapaling tsa COSAFA tse neng li tšoaretsoe Naheng ea Afrika Boroa, tlas'a bokoetlisi ba Leslie Notši. Makoanyane XI nakong ena ea khoeli eo se ntseng se tšoere ka thata ho ikoetlisa, e tla pabala lipapali tse 'maloa tsa machaba tsa setsoalle e le ho ipeha sekaleng.

Ho sa le joalo, bahlanka na bao mokoetlisi Makepe a tlang ho e lata letailane ka bona; ka ho lithibathibane ke Bataung 'Moleli, Hopolang Pitsi le Lehlohonolo Maloka, ho ba bapalang moleng o kamorao, ke Kabelo Tuoane, Tlhokomelo Masiloane, Manama Hlojeng, Bafokeng Ntseno, Tsebo Mafole, Atang Mokhali, Katleho Mokoane, Kabelo Nsutheleng le Tumelo Potsane.

Ho ba bapalang bohareng ba lebala ke Lekanyane Kalache, Lehlohonolo Mafa, Relebohile Molete, Hlomp

pho Phalatsi, Rapelang Sefuthi, Kananelo Sebilo le Pitso Tamesi. Haele bahlabalintlha bona ke Reamohet-

soe Mohloai, Bokang Ntepane, Relebohile Melato, Paseka Ntlaloe le Morena Masithela.



O makatsa barati ba bolo

e ne e le hore sehlopha se ke se etse nalane lipapaling

tseo se tlang se li lebile tsa machaba. "Takatso ea rona ke hore ka sehlopha sa Lijabatho, Basotho ba imone monoana ka hore re phunyeletse re fetele pele ho makhaola-khang a lipapali tse, tseo re tlang re li lebile." A rialo.

A re hajoale boikoetliso ba sehlopha bo qalile tlas'a eo e neng e le motlatsi oa mokoetlisi, Monghali Kabelo Malapane a tlatsetsoe ke Paradise Moeketsi. Ke bona ba tla 'ne ba tsoelepele le sehlopha ho fihlela mokoetlisi e mocha a fihla. A tiisa menyenyetsi ea hore Lijabatho e ntse e rera ho theola mokoetlisi e mocha Naheng ea England, che, le hoja a itse ke hona e sa ntseng e le litaba tse ntseng li le ka pitseng ha li e-s'o tšo-loe. "Morero ke ho tla sireletsa mohope ha selemo se secha sa lipapali se qala." Ke Moletsane eo.

James Madidilane o siea sehlopha sa Lijabatho se le boemong bo holimo haholo ba hoba sona sehlopha sa pele sa ho phethela Liki e Kholo se hapile lipapali tse 19 kaofela, sa bapala ka ho lekana ho tse robeli, sa lahlehela ke tse tharo sa bokeletsa lintlha-kholo tse 65. Ke sona feela se lahlehetsoeng ke lipapali tse tharo selemong sa lipapali tsa 2025/2026.



Tšeliso Thakholi

Mokoetlisi oa Sehlopha sa Bolo ea Maoto sa Lijabatho 'Malala' ka moo ba se renketsang ka teng, Monghali James Madidilane, o ile a makatsa barati le batšehetsi ba bolo ea maoto h'a furalla sehlopha sa hae sa Lijabatho kamor'a ho hapa Mohope o Moholo oa Liki ea Vodacom oa selemo sa lipapali sa 2025/2026, a leba se-

hlopheng sa Liki e Kholo ea Afrika Boroa sa Golden Arrows, moo a seng a il'o sebetsa e le motlatsi oa mokoetlisi.

Boitokollo ba Madidilane bo tla nakong e thata haholo eo sehlopha sa Lijabatho, seo e leng bompoli ba Liki e Kholo, se neng se lokela ho qala ho itokisetsa lipapali tsa sona tsa Mohope oa CAF Championship. Boitokiso bona bo ile ba tlameha ho emisa ha nakoana ha botsamaisi bo ntse bo ima-

mella hore na ke bo mang ba tla ntšetsa mosebetsi pele.

Puisanong le Raliphatlalatsi oa sehlopha sa Lijabatho, Monghali Tankiso Moletsane, o boletse hore boitokollo ba mokoetlisi Madidilane bo ba rahile maling a mpa habohloko, kaha ba ne ba ntse ba tšepile hore o tla tsoela pele le sehlopha ho fihlela se bapala lipapali tsa machaba tsa Mohope oa CAF Championship. A re morero o moholo oa bona

tsa machaba ka ho sebetsa hantle ho feta lihlopha tse ling tse kileng tsa bapala lipapali tse.

A re leha karohano ena e bile bohloko ka ho fetisisa, empa ho ne ho se ka moo ba neng ba ka etsang kateng, kaha a itokolotse ka khotso ho leba makhulong a matala. A kopa barati le batšehetsi ba sehlopha le Basotho bohle ho khoba matšofo, kaha sehlopha se ikemiselitse ho sebetsa ka thata lipapaling tsohle

Tšepo e holima linaha tse tharo

Tšeliso Thakholi

Barati le batšehet-si ba tikoloho ea Afrika, ba bolo ea maoto ba behile tšepo e kholo ea bona holima linaha tse 'ne tsa Afrika e leng; Ivory Coast, Morocco, Ghana le Egypt ea hore li tla fetela mekhahlelong e hlahlamang ea litlholisanong sa Mohope oa Lefatše tse ntseng li bapala ka makhethe a maholo. Ho fihlela hajoale ke linaha tse supileng har'a tse leshome tsa Afrika tse bonahalang li tlii'o likelloa ke letsatsi tseleng.

Kamor'a hore linaha tsa Afrika tse kenelang Mohope oa Lefatše li eketsoe ho ba leshome, tšepo e ne e le hore Afrika e tla ba le monyetla o moholo oa ho feta litikoloho tse ling tsa lefatše tsa ho fumana ho ena le naha e le 'ngoe, e ka fihlang ho makhaola-khang a Mohope oa Lefatše. Monyetla ona oa bohlokoa oa Afrika o tlang ha 'ngoe kamor'a lilemo tse 'ne, linaha li lokela ho o sebelisa ka nepo hore ho be le sehlo-

pha sa Afrika se tla kena ho makhaola-khang a mohope ona.

Keketso ena ea linaha tsa Afrika ke monyetla o motle haholo o lokelang ho sebelisoa ka tsela e hlokolosi, kaha o butse lesoba le lehlo la hore ho be le naha ea Afrika e ka qetellang e hapile Mohope oa Lefatše.

ka-makhaolakhang e ne e be Egypt. Ka 1990 Naha ea Cameroon e ne ebe eona naha ea pele ea ho fetela mokhahlelong oa tse robeli tsa ho qetela lipapaling tse neng li bapalloa Italy.

E ile ea hlalangoa ke Ghana lipapaling tse bileng Afrika Boroa ka 2010. Ha ka 1998 Naha ea Senegal

letsatsi tseleng, e ne e be naha ea boraro ea Afrika ea ho fihlela mokhahlelong ona. Har'a linaha tsena tsa Afrika tse 54 tsa bolo ea maoto, Morocco haesale e le eona e tsosang lichaba tsa Afrika morolo ka ho sebetse hantle hore e qetelle e se e kene lipapaling tsa ho qetela. Le selemong sena

hope ona.

Ke takatso le taba-tabelo ea Moafrika e mong le e mong hore Mohope oa Lefatše oa 2026 o ke o tle Afrika. Tšepo ke hore linaha tsa Afrika tse leshome li ke ke tsa tsoa kaofela litlholisanong tsena, empa li na le monyetla o moholo oa ho iphumana li tliiselitse Afrika tlhoho. Ka ho khetholoha Naha ea Egypt ke eona e seng e ntse e lihula pele Mokhahlelong oa G ka ho hapa papali ea eona ea pele le ho bapala ka ho lekana papalinge le 'ngoe.

Tšepo e kholo e holim'a bahlaba-lintlha ba bararo e leng Mahomed Salah ea bapallang sehlopha sa Liverpool le Omar Marmoush ho tsoa ho Manchester City. Ha e mong ea lebeletsoeng ho tlietsa Afrika tlhoho ke Hamza Abdelkarim ho hlaha ho Barcelona. Taba ea bohlokoa ke hore Egypt ha e lokele ho ba le khatello e matla ea hore Mafrika a se a shebile ho eona hore ba hlole lipapali tsohle tse ba tjametseng. Empa e loane ntoa ea khomamela ho fihlela e kena ho makhaola-khang eba e nka mohope ona.



Ka 1934 ha mohope ona o ne o qala naha ea pele ea Afrika ea ho hlaha ho se-

e bonahalang lipapaling tsa selemo sena e le tsietsing e kholo ea ho tla likelloa ke

ha hona phetoho ea letho, e ntse e bonahala e sebetse ka thata ho tla ikhapela mo-

Lipapali tsa Senuka li fihla pheletsong

Tšeliso Thakholi

Lihlopha tsa papali ea Senuka li ile tsa nkana khikhitha mabaleng a fapakaneng kahar'a naha ka Sontaha sa la 21 Phupjane monongoaha, lipapaling tsa liki tsa Mokhahlelo oa First Division le Second Division tse etellang tsa ho qetela pele. Ke mona moo

Airborne e hlileng ea itšupa hore ke eona bompoli ba First Division kamor'a ho teteka ntle ho qenehelo Sharks ka phafa e bohloko ea 18-7.

Har'a lihlopha tse neng li qothisana lehlokoa, tleki e hlile ea lla ha lihlopha tse nyenyane li ne li qala lihoreng tsa hoseng e le ho hlekela lihlopha tse kholo, e leng tsona tse neng li shebiloe ka leihlo le nchocho, kaha e le tsona tseo ho

neng ho lokela ho bonahala hore mpoli ke mang, le hore tse peli tse tlii'o theohela mokhahlelong oa Second Division ke li fe.

Ke mona moo e itseng ha li qala li thakhoha feela, sehlopha se maemong a pele ho Second Division sa Marabele, sa hlola sa Parabae ka lintlha tse 17 ho tse 8, Lechaeneng One ea tsoa ka lesobana la nale ho Drop Zone ka 13-12, Club House ea otloa ke Elephants ka 13-

10, Mahatakele ea hatekela KL ka 17-8, eaba sehlopha se ileng sa e-ba matla haholo papaling ea Senuka sa Telemedia se otla Khachis ka 14-11.

Ha lihlopha tse nyenyane li ntse li tsoela pele, Master 50 Plus ea phonyoha ka mokhoa oa mohlolo ka 13-12, hoja Kelly e ne e petelitse habohloko. Ka mokhoa o tsoanang Khotsong le eona ea phonyoha ka mohau ho Caesars ka 13-

12. Haele Santon ehliile ea iketsetsa borata ka ho paqamisa Action Bar ka phafa ea 25-20. Ho tse kholo, Lacasa e boemong ba bobeli lokong e ile ea hobosa Mookoli ka ho e terapa 17-8, Monneng le eona ea khakhatha Bakwena 17-8.

Ho ea ka e mong oa litho sa Komiti e Kholo, Monghali Nazar Surtie, lihlopha tsohle li saletsoe ke lipapali tse peli pele li phethela liki, 'me hang ha li fela ho tla nkoa lihlopha tse 'ne tse tse ipabotseng mokhahlelong ka mong, ho ea bapalana, ho fumana mohloli oa Setereke sa Maseru. A tiisa hore Airborne e se ntse e le eona e nkileng mohope, kaha ho se ho se sehlopha se ka hlolang se fihla ho eona, leha se ka hapa lipapali tsa sona tse peli tse setseng.

A boela a tiisa hore Caesars le Coolside li se li ntse li rathiloe ke selepe, ha Marabele le Lechaeneng One e le tsona tse tlang ho nyolohela liking e kholo hang ha lipapali li fihla pheletsong. A qetella ka hore o hlokometse hore papali ea Senuka e ntse e hola ka potlako e kholo kahar'a naha, le hoja qholotso e kholo e ntse e le tlhokahalo ea mabala moo lihlopha li bapallang teng.

